



12.08.2024

UKA2024/98

Inatsisartut Suleriaasianni § 33 naapertorlugu aalajangiiffisassatut siunnersuut imaattoq matumuuna saqqummiuppara:

Suliassaqarfik Aningaasarsiornikkut iluarsissuteqartarneq nakkutilliinerlu, Namminersornermut inatsit naapertorlugu liste II imm. 25, Kalaallit Nunaanni oqartussaavigineqalernissaanut Naalagaaffeqatigiinni oqartussanut isumaqatigiinniarnert aallartinneqarnissaat siunertaralugu saaffiginninnissaannut Naalakkersuisut peqquneqarnissaat Inatsisartunut aalajangiiffisatut siunnersuut.

(Inatsisartunut ilaasortaq Pele Broberg, Naleraq)

Tunngavilersuut:

Siunnersuutip akuerineratigut Naalakkersuisut peqquneqassapput suliassaqarfik Aningaasarsiornikkut iluarsissuteqartarneq nakkutilliinerlu, Namminersornermut inatsit naapertorlugu liste II imm. 24, Kalaallit Nunaanni oqartussaavigilernissaa siunertaralugu Naalagaaffeqatigiinni oqartussanut (Rigsmyndighederne) Naalakkersuisut isumaqatigiinniarnert aallartinneqarnissaannut peqquneqassapput.

Siunnersuutip akuerineratigut nammineerluta Folketinget aqqutigiunnaarlugu nalimmassaasinnaavugut, inatsisiliorsinnaavugut, ingerlariaaserlu tamaat Inatsisartut aqqutigalugit tulluarsaasinnaalissavarput.

Oqartussaavigilernissaanut siunertaasa ilagaat, Soraarnerussutisiaqarnissamut aningaasaateqarfinnut assigisaanullu piumasaqaatigisagut namminerisamik naapertorlugit sinaakutissiorluta ammaassinerusinnaaniassagatta, Nunatsinni aningaasaliinerunissaq nalunannginnerutilertinniarlugu. Taamaasilluni siunnersuutip siunertaraa, Naalakkersuisut Naalagaaffeqatigiinni oqartussanut saaffiginnereernermi saniatigut inatsisitigut pisariallit suliarissagaat, taamaasinikkut soraarnerussutisiaqarnissamut aningaasaateqarfiit assigisaasalu nalunannginnerusumik aningaasaliisinnaanerat anguniarsinnaaniarlugu.

Aningaasarsiornikkut iluarsissuteqartarneq nakkutilliinerlu Kalaallit Nunaata oqartussaavigilernikuunngimmagu, ilaatigut toqqaannarttumik "kalaallit" soraarnerussutisiaqarnissamut aningaasaateqarfiit Nunatsinni aningaasaliisinnaanngillat. Nunatsinnut aningaasalersuisinnaasariaqarpugut. Piumasaqaatigut pilerisaarutigisinnaasagullu nammineerluta soraarnerussutisiaqarnissamut aningaasaateqarfinnut assigisaanullu tulluarsarsinnaasariaqarpugut, Nunatsinnut, inuinit, suliffeqarfinnullu iluaqutaasinnaasunik ataavartumik aningaasaliisoqarsinnaaniassammat.

**Pisortanut aningaasatigut allaffissornikkullu kingunerisassai:**

“Finanstilsynet” tamaat oqartussaavigilernissaanut aningaasartuutaasinnaasutut missiliutit naatsorsuutigineqartut¹ katillugit imaapput:

Aningaasartuutit (Udgifter): 1,1 mio. kr.

Isertitat (Indtægter): 0,2 mio.kr.

Aningaasartuuterpiaat (Nettoudgifter): 0,9 mio. kr.

Suliassaqarfik Aningaasarsiornikkut iluarsissuteqartarneq nakkutilliinerlu Kalaallit Nunaanni oqartussaavigineqalernissaanut aningaasartuutaasinnaasutut missiliutit naatsorsuutigineqartut kisitsisit 2015-imeersut atorlugu naatsorsorneqarnikuupput. Taamatuttaaq aningaasartuutit missiliuutaallutik, aningaasartuutaasussammi Naalakkersuisut, tassanngalu Inatsisartut, oqartussaavigilerneranut Naalagaaffeqatigiinni oqartussanut isumaqatigiinniareernermi suut piumasaaqatigisimassaneraat.

Taamatuttaaq aningaasartuutissarpiaasa ersernerlussinnaanerannut nuussornermi ilisimasat annaasinnaaneri, tassanngalu aallarnisaanermut aningaasartuutaasinnaaneri ilaasinnaapput. Naalakkersuisut allamik isumaqassagaluarpata tamanna naalakkersuisunit suliap siullermeerneqarnerani akissummi nassuiaateqarfigineqarnissaa piumasarineqarpoq.

Namminersortunut aningaasaatigut allaffissornikkullu kingunerisassai:

Soqanngilaq. Siunnersuutip siunertaa tamakkiisumik atuutilersinneratigut inernerisinnaavaa, Namminersortunut aningaasaatigut iluaqutigineqarsinnaasunik aningaasaliinerusinnaanerit.

Innuttaasunut aningaasatigut allaffissornikkullu kingunerisassai:

Soqanngilaq. Siunnersuutip siunertaa tamakkiisumik atuutilersinneratigut inernerisinnaavaa, Namminersortunut aningaasaatigut iluaqutigineqarsinnaasunik aningaasaliinerusinnaanerit.

¹ Redegørelse vedrørende mulig overtagelse ad de i bilag 1 til selvstyreloven anførte områder (2017), Finansministeriet